



Nakon hapšenja bh. diplomate zbog trgovine ljudima

Konzul Hamidićević sve priznao u Tužilaštvu

Predloženo da se Velidu Hamidićeviću, konzulu Ambasade BiH u Parizu, odredi kućni pritvor • Policajci će nasumično provjeravati pridržava li se mjere

Nakon nezapamćenog skandala u bh. diplomatiji, kada je uhapšen Velid Hamidićević, konzul Ambasade BiH u Parizu, on je jučer saslušan u Državnom tužilaštvu, gdje je, prema informacijama našeg izvora koji je uključen u ovu opsežnu istragu, u potpunosti priznao krivična djela koja mu se stavljaju na teret.

Proširenje istrage

Također, Tužilaštvo je predložilo Sudu BiH da se Hamidićeviću odredi mjera kućnog pritvora, a policija će nasumično provjeravati pridržava li se te mjere. Isti izvor navodi da postoje indicije da je još osoba uključeno u izvršenje ovih krivičnih djela te da će se istraga, najvjerovatnije, proširiti. Istrazitelji SIPA-e pretresli su i prostorije Ambasade BiH u Parizu, odakle je izuzet dokazni materijal.

Podsjećamo da je Hamidićević uhapšen u Sarajevu, u okviru akcije SIPA-e kodnog naziva CD, zbog sumnje da je članovima organizirane kriminalne grupe Elvisa Salčinovića nezakonito izdavao putne listove za žrtve trgovine ljudima te da je za te usluge naplaćivao od 500 do 1.200 eura po osobi.

Hamidićevića SIPA i Tužilaštvo terete za krivična djela zloupotreba službenog položaja ili ovlaštenja, primanje dara i drugih oblika koristi, krivotvorenje službene isprave i trgovina ljudima. Inače, Hamidićević je svojevrstno bio načelnik PU Zavidovići, a potom i načelnik Centra službe bezbjednosti (CSB) Zenica, a često je spominjan i kao aktivni član obavještajnih struktura još od vremena AID-a. To je, kako nezvanično saznajemo, Hamidićeviću pos-

lužilo za uspon u karijeri te je godinama prisutan u diplomatiji. Ovo mu je bio drugi mandat u Francuskoj, a bio je angažiran i na diplomatskim poslovima za BiH u Švedskoj.

Tužilaštvo BiH je akciju započelo 23. juna ove godina, kada je uhapšeno 10 osoba s Elvisom Salčinovićem iz Zenice na čelu. Ova grupa bavila se trgovinom žena i djece, a koje su u Francuskoj koristili za džeparenje i prosjačenje. Sumnja se da je ova grupa na taj način zaradila oko dva miliona maraka. Sud BiH odredio je jučer pritvor i osumnjičenom Vehbiji Salčinoviću, koji se sam predao.

Trgovina ljudima

Ovaj šokantni slučaj pokrenut je nakon brojnih pritužbi vlada Kine i Japana Francuskoj o pljačkama

i džeparenju njihovih državljana od romskih osoba po Parizu i drugim francuskim gradovima. Francuzi su utvrdili da se radi o organiziranom lancu, vođenom i osmišljenom u BiH.

Sud BiH je do 23. jula pritvorio Elvisa Salčinovića, Denisa i Tonija Hamidovića te Luku Hrustića, jer bi mogli pobjeći ili utjecati na svjedoke i dokaze u slučaju u kojem su osumnjičeni za krivično djelo organizirani kriminal u vezi s krivičnim djelima trgovina ljudima, krivotvorenje osoba, pranje novca, nasilničko ponašanje, nedozvoljeno držanje oružja ili eksplozivnih materija, krivotvorenje isprave i falsificiranje ili uništavanje službene isprave.

A. ALJIMI

Suspenzija nakon zvaničnog obavještenja

Igor Crnadak, ministar vanjskih poslova BiH, kazao je na jučerašnjoj pres-konferenciji u Sarajevu da je u srijedu iz Tužilaštva BiH usmeno obaviješten o hapšenju državnog službenika Ministarstva vanjskih poslova (MVP) BiH koji je radio na poziciji savjetnika za konzularne poslove u Ambasadi BiH u Francuskoj.

Crnadak nije naveo ime službenika Velida Hamdičevića, uhapšenog u zajedničkoj akciji koju su proteklih mjeseci vo-

dila tužilaštva BiH i Francuske, ali je kazao da je MVP bio uključen u te aktivnosti.

- Najveći broj naših diplomata i državnih službenika radi svoj posao časno i pošteno i zato pojedinačni slučajevi korupcije i zloupotrebe moraju biti sankcionirani - kazao je Crnadak i podsjetio da se uhapšeni službenik tereti za nezakonito izdavanje dokumenata i nezakonito omogućavanje boravka i putovanja za veći broj osoba. Crnadak je kazao da će, nakon što



Crnadak: Korupcija mora biti sankcionirana (Foto: S. Saletović)

MVP dobije zvanično obavještenje o hapšenju službenika, biti pokrenut proces njegove suspenzije. **S.D.**



Hamdičević: Naplaćivao putne listove



Detalj s pretresa Ambasade BiH u Parizu